

Proho Jesu Christa thakda ralakra. Hi Ana Okathui hili pamda lei lakha zingkhum thing khaniwui mamangli ngashit kahai tuina (Jn 14:1-3). Jesu Christa ralakra kachi hi ithumna kathada theipaira khala? Jesu Christa akhalat-tana hangmaran kahai chi ningsanglak eina palu kala chi akathanga atamli rashokrada Ana hang kahaina. Kathara Tuili hang maran kahai chi ning ngasharлак eina kapa kala okathuili arui arui shokdakhalei otshotbing ngaheo khayang chitharan Jesu Christa ralakra kachi mathingrik eina kathei samphangra.

1 KHORUM KHAVAI SHIM SAKHAKHAYANG

Jesuna vareshim chiwui eina thuihaokhi kachi atam chitharan Awui sakhangathabingna vareshim chi yang khavai Ali hoyo. Jesuna hanga, "Saikora hi nathumna yang khazak khuipaira. Ina kachangkhat nathumli kahangna, ngalung akhawui tungli ngalung akhala maleilui mara; ngalung kachiva horkathan ser haora" (Matt 24:1-2; Mk 13:1-2; Lk 21:5-6). **Hi kachangkhat eina 70 A.D.** (zingkum hangshini Jesu Christa kapharawui thili) **li rashok kahaina.**

2 JESU CHRISTA KHARAWUI KHUDAM

Jesuna Olive kaphungtonli pamlaga, sakhangathabingna ngathumda Ali ra ngahana, "Hi katharan shokra khala, ithumli hangmilu kala nana rakhi kachi eina okathui ngachangkhi kachiwui machut khira khala?" (Matt 24:3; Mk 13:3-4; Lk 21:7).

3 HANG KAKHAYEI BINGLA SHOKRA

Chi eina Jesuna ngahankhai, 'Nathumli mathanngui khavai ning ngasharlu; Khikhala chila mi kachungkhana Iwui ming singda ralaga 'Messiah chi ina' da hangra kala mikachungkhali than nguira (Matt 24: 4-5; Mk13:5-6; Lk 21:8).

4 RAIREI KALA RAIWUI PAO KHANGAYAO

Nathumna kata khanaiwui raipao kasha tharan malung matatunghai alu, hikatha hi shokphalungra kha china khangachang atam

maning mana (Matt 24:6; Mk 13:7; Lk 21:9).

5 MIYUR AKHA EINA AKHA RAISAKHANGAROK | NEINA KHANGANUK | CHAMREI | KAZAT

Miyur akhana miyur akhawui tungli, yur akhana yur akhawui tungli rai sara. Apam kachivali chamrei kala neina kakhanuk shokra (Matt 24:7; Mk13:8; Lk 21:10-11).

6 Otshot saikora hi kachot kachangwui haokaphokna (Matt 24:8; Mk13:8).

7 VARESHINAOBINGLI REKKAKHAREK

Kha saikora hi mashok ranglaga athumna nathumli tuk-khuida rekkhareklaga khorum khavaishimli khuivara kala phatoplila sangra kala nathumli Iwui mingwuiwang eina awungabing eina governorbingwui mangali nganing khavai khuivara. Hi shakhi mikhavai nathumwui vang kacha atamna (Matt 24:9; Mk 13:9; Lk 21:12-13).

8 Nathumli bichar sakhavai athumna khuikhavai kala mikasang tharan nathumna khi hangra da rida makhanang-alu. Kha atam chichangli khami chi hanglu, kaja nana khamatui maning mana kha mangla katharana khamatuina. Chiwui vang eina nawui ningli ina kathada ngahankarakhala da rida machuk majalak marada phaningthit haolu. Kachiya Ina nathumli matui katheila, thangkameila mida nathumwui yangkashe khipa nakha nathumna kahang chili ngateida makhalat khuirarmara kala mamashungmana dala mahang rarmara (Mk 13:11; Lk 21:14-15).

9 SHIMKHURLI KAHAT

Nathumli navanava ngara nala, nachina ngara nala, athei-asa nala yansaira kala nathum khaikhali sakathatla sathat haora. Nathumli Imingwui vang mi saikorana ning kachaira. Kha nathumwui sampanao akha eina tangda

mashiman ngasak mara. Nathumwui langtha kathei china nathumwui mangla kharing samphangra (Matt 24:9-10; Mk 13:12-13; Lk 21:16-19).

10 LEIKASHI SUIKATA

Kala makapha makhaya mataisang haoda mikachungkhawui leikashi suita ngasakra. Kha khanao eina tangda khang kashap mi chi kahui samphangra (Matt 24:12-13).

11 WUNGRAMWUI PAOKAPHA

hi miyur hupta shakhi mikhavai okathui peida hashokra kala chiwui thili khangachang chi rara. Yur saikorali paokapha hi rida hashok phalungra (Matt 24:14; Mk 13:10).

12 JERUSALEM NGAZAKYANG KAHAI

Kha Jerusalemlai rai mina khuikhananam chitharan kashiman atam nganai-ura da theilu (Lk 21:20). Maran Daneilna, 'khangachi khangacham' pongli hangkhai nathumna theira. Chi kathara pamli nganing sara. Chitharan Judeali leikasabingna kaphungli yamvaphalungra. Shimtungli leikasapana tunglaga shimlungli zangda thongthang mazangkhuilui a-ranu, luili leikasapa china kachon unghui khavai malat unghalungmara (Matt 24:15-18; Mk 13:14-16; Lk 17:31; 21:21). Iyavo, atam chitharan naovaikasabing eina na shiman kasabingwui kalashat! Nathumwui khayamchi sikachang kala sabbaththang mashok khavai Vareli seiha salu (Matt 24:19-20; Mk 13:17-18; Lk 21:23). Athum kaikhali raikhai eina shat-thatra, khangateibingli narkhai rao sada yur saikorali khuivara kala yur khangateibingna Jerusalemwui tungli naikazamra (Lk 21:24).

13 JACOBWUI KACHOT KACHANG ATAM

Kaja atam chitharan shokkhi kachi kakhanang kachot chi haokaphok wui eina thuilaga aja

rashungda mashoklak ranga. Naodala chikatha mashoklui mara. Kha Varena atamchi shasang ngasak haira, chithada ana masasasi kachiya mi khipakha kharing masamphang mara. Kaja awui kapangkhuui kahai mibingwui manga eina Varena zimikshobing chi shasang ngasakra (Matt 24:21-22; Mk 13:19-20; Lk 21:23). Kaja kathara lairikli kapi kahai tuichi unghungkhavai athut kakhui atamna (Lk 21:22).

14 KHANGUIYA CHRISTA KALA PAO KAZATTA

Chiwui thili kachi kathana nali, 'yanglu, christa hili lei, chili leili' da hanglala mashitsang alu. Kaja minamma Christa kala minamma maran shokra, sapai akha Varewui kapangkhuui kahaibingli than ngui khavai khudamla kala mathakhak kahai otsakla kachungkha athumna chitheira. Kha ngasharlu kachiya Ina nathumli saikora hi hangmaran kahaina (Matt 24:23-24; Mk 13:21-23). Kachikatha mina nathumli 'Yanglu, siwuk hili A leili' da hanglala mava alu; Kala 'Yanglu, A hili ngathumli da hanglala mashitsang alu, kaja Miwui Naomayarana khara chi rikhanna zingsho zingthun vashungda khangashei takham haora (Matt 24:26-27; Lk 17:23-24).

15 KAZINGRAMWUI KHUDAM

Kachot kachang samkaphang atamwui thichangli zimikla thangmang haora, kachangla mahorlui mara, sirabingla tatung haora kala atungshongwui pangshapla nganuk haora (Matt 24:29; Mk 13:24-25; Lk 21:25). "Zimik, kachang, sira saikorali mathakhak kahai kachungkha shokra, kala shamadruwui tara khangaphao khon shada khangachee eina



okathuili pakhangapawui kachot kachang rara. Okathuili rashok khi kachi phaning pamda mibingna khangachee eina ning shimanra; kaja , kazingramwui pangshapbing nganuk ngasakra (Lk 21:25-26).

16 Chiwui thili **MIWUI NAOMAYARANA RAKHI KACHIWUI MACHUT** chi khamasaili theira; kala Miwui Naomayarana pangshap kala tek-khamatei eina ngasoda muiyatungli tongda khara kathei eina okathuiwui mibing saikorana chapra. Kahaka talla khongra, kala Ana Awui kazingraobingli okathuiwui achikhun matili chiho vara kala athumna Awui kapangkakhui mibingli okathuiwui akathanga akhawui eina akathanga akha vashungdali khaleibingli kazipkhuiira (Matt 24:30-31; Mk 13:26-27; Lk 21:27).

17 Chi eina otshotbing hi shok-kaphok chitharan nathumwui kui khangkada yanglu, khikhala chila nathumwui ngatangkhani am chi nganailak haira (Lk 21:28).

18 Khaorarongwui eina tamkhuilu. Aphangbingchili shondhar shokta thingna mathekzim kahai tharan Mayo kachang ra-ura da nathumna thei. Chi takham eina, **otbing hi kashok chitharan, Vare khara nganai haira, khamongpheili rashung hairada nathumna theira** (Matt 24:32-33; Mk 13:28-29; Lk 21:29-31). Mi khipa nakha zimiksho eina pungchi matheimana, kazingramli khalei kazingraobing eina tangdala kala Anaomayarala matheimana, Avava mangna katheina (Matt 24:36; Mk 13:32).

19 Miwui Naomayarana khara hi **NOAHWUI ATAMLI** kashok chitha papamra. Tara maphongrang lakhawui eina thuida Noahna marikhongli kazang eina tangda

athumna phakashak phakaza, ngala kakhui kala fakathui ot sasai. Tara phongda athumli makheithuiranglakha eina tangda khishok haora khala kachi athumla matheimana. Chitha sada Miwui Naomayarana kharala chitha papamra (Matt 24:37-39; Lk 17:26-27).

20 **LOTWUI ATAMLI** chitakham eina sasai, Athumna phashak phazai, khalola loi, khayorla yorra, luila vai, Shimla sai, kha Lotna Sodom wui eina shokthanghon kazingramwui eina meiwon eina rotada athum saikorali shiman ngasaka. Miwui Naomayarali phongmi thanghon chi takham eina shokra (Lk 17:28-30).

21 Lotwui preivali phaning unglu! Mangla ringkhavai kaphami chi shimanra, kha chi kashimana chili ring ngasakra (Lk 17:32-33).

22 *Atam chitharan luili mikhani lei sara,* akhali khuithuihaora kala akha pali haihaora. Preinao khanina ma rung sara, akhali khuithui haora, akhapavali hai haora (Matt 24:40-41; Lk 17:34-36). Kala athumna ngahanna, “Khali khala, Proho?” Ana ngahankhai, “Kathi ngun khaleipam kachida khalangbing kazipra” (Matt 24:28; Lk 17:37).

23 **YANGKAZAZAKLU KALA SEIHA SAKAZAZAKLU** Hiya mi akhana shimwui eina zatkhaphok tharan awui raobingli shimchi mayon khavai horsangmihailaga kala mi avavali kachichawui othun mihailaga kala khamong khamayonna li mayon kazazaklu da kaso hailakha kharam vakhahai kathana. Chiwui vang eina mayon khariklu, kala shimva china ngazin nikha, ngaya sailungli nikha, harva kakhongli nikha, ngathorshong li nikha, katharan ungni khala kachii nathumna mathei mana. Ana kashuirak hankha ung tharan nathum pisa paishina (Mk 13:34-36).


24 kachi theisasi kachiya Ana ngasharda rimpamlaga khaliya chili Awui shim mashao khai ngasak mara. Chiwui vang eina nathumla ngaranbing haisa phalungra, khikhala chila nathumna maphaning salak kachi pung chili Miwui Naomayara china rara (Matt 24:43-44).

25 Ning ngasharda seiha kasa eina ngasoda rimpamlu; khamang kachawui khamarip, shuikhengarui kala okathuiwui otna yuihai pashina, khikhala chila khazing wungram chi katharan rani khala nathumna matheimana. Okathuili kapan mangla huptawui vang kharen kasang thada kashuirak eina rara (Mk 13:33; Lk 21:34-35).

26 Kha am kachida ning ngasharlu kaja rashok khi kachi ot saikora hiwui eina yamshokshap khavai kala Miwui Naomayarawui mangali nganingshap khavai seiha sachinglu (Lk 21:36).

27 Kachangkhat eina Ina nathumli kahangna, ot saikora hi mashok ranglakha eina tangda *hiwui mithot* hi mashimanlak mara. Kazingram kala okathuila shiman haora kha Iwui tui mashiman lakmara (Matt 24:34-35; Mk 13:30-31; Lk 21:32-33).

Tek-khamatei wungpamkhongli pamda, hak-khamataiya Awunga – Proho Jesu Christa hak-khamaha pangshap singlaga Awui khazingrao kala maranbingli ngasoda thaklak eina latraluira. Proholi ngacheelu kala sochikhatlu kaja Ana bichar kasa am chi rahaira. Okathuila, kachingla kala ngayila kasa A chili khorumlu (Phongkhami 14:7) ATAM CHI MAKHAHAT LUI MARA! Khazing wungram rashungkhi chi nganailak haira. Ning ngateida Varewui tui hili shitsanglu. Nawui Proho Vareli samphang khavai ngaranlu!



Local Contact Address

TANGKHUL | INDIA